
«Дарё»: Марғилонда 11—13 июль кунлари «Буюк ипак йўли» халқаро фольклор мусиқа фестивали ўтказилади

Биринчи «Буюк ипак йўли» халқаро фольклор мусиқа фестивали жорий йилнинг 11—13 июль кунлари Марғилон шаҳрида ўтказилади. Мазкур фестивалга дунёнинг 80 га яқин давлатидан сайдёхлар келиши кутилмоқда. Бу ҳақда «Дарё» мухбири хабар бермоқда.

Вазирлар Маҳкамасининг 2018 йил 18 майдаги «Буюк ипак йўли» халқаро фольклор мусиқа фестивалини ташкил этиш ва ўтказиш тӯғрисида»ги қарори асосида Марғилон шаҳрида халқаро фестивалга тайёргарлик ишлари бошлаб юборилди. Фестиваль логотипини тайёрлаш ва танлаб олиш бўйича танлов эълон қилинган. Шаҳарда ҳунармандлар маркази ва ҳунармандлар бозори қурилмоқда. Шунингдек, 36 та ҳунармандлар уйи ва 2 та карvonсарой қуриш режалаштирилган.

— Май ойига қадар фольклор жамоалари ўртасида саралаш босқичлари бўлиб ўтади. Шахримизнинг «Чодиржамол» фольклор жамоаси томонидан ҳам тадбирга алоҳида тайёргарлик ишлари олиб бориляпти. Унутилиб бораётган эски лапарлар, ўланлар фестивалга мос руҳда қайта ишланяпти. Қолаверса, анжуманда асқия санъати намуналари ҳам ижро этилади, — дейди Марғилон шаҳар маданият бўлими бошлиғи Маҳмуджон Эминжанов.

«Буюк ипак йўли» халқаро фольклор мусиқа фестивали ҳар икки йилда бир марта уч босқичда ўтказилади. Унда қўшиқчилик санъати (алла, ўлан, лапар, терма, маросим қўшиқлари, ҳалфачилик, баҳшичилик ва ҳоказо), рақс санъати (турли ҳудудларга хос ҳалқ рақслари), миллий қадим фольклор чолғучилик санъати (миллий мусиқа асбобларида асарлар ижроси) каби номинациялар бўйича танловлар ўтказилади.

Фестиваль доирасида илмий-ижодий конференция ва танлов қатнашчилари иштирокида гала концерт ташкил этилади.

Фестиваль ғолиблари қуидаги пул мукофотлари билан тақдирланади:

1-ўрин (ҳар бир номинация) — 3 500 АҚШ доллари;

2-ўрин (ҳар бир номинация) — 2 500 АҚШ доллари;

3-ўрин (ҳар бир номинация) — 1 500 АҚШ доллари.

2019-03-01 19:54:23